



童年紀事

還細時節，有一個掇泥毋洗手个搞伴仔安做弘彰，係吾叔伯阿哥个俅仔，同佢年紀相仿，毋過愛喊佢阿叔。國民學校官畢業，佢就跔厥爸移民去巴西。過後就毋識見面，也無通信。直直到近恁多年，人類通訊工具進步騰飛，吾這個搞伴姪仔正有一息仔消息傳轉來。大體過隔有兩年，佢聽歌在老屋个房內兄弟仔講，弘彰仔愛轉臺灣來辦事情，佢煞煞同老屋連絡。上禮拜，兩個叔姪兼老朋友總算見著面。

打早，佢借加一輛自行車，同弘彰仔兩儕騎等對老屋大禾埕出來，佢想帶佢遶一下頭擺共下拈揚尾打草蜢个河脣田畝。佢兜歇个老屋面前無幾遠就係大河壩，係佢兩儕盡多摸螺挖蟹个回憶所在。佢兩儕先騎到河壩脣，看著一條石砌面項紅毛泥打到亮亮个自行車道，還過河壩中央有一座紅毛泥同鋼筋探起來个大橋，做得行轎車。弘彰仔看著，頭那緊搖，嘴項緊講，仰會變化恁大。想著頭擺還細讀書時節，對屋下到學校，歸路仔赤腳嫻踏，行田塍路，過河壩係石跳仔路，發風落雨，淨有笠嫻好戴，發大水過毋得，愛大人背等過，較急水該條河路，有大人探个臨時便橋，盡早係用麻竹筴合起來个，下後正用枋仔探。毋過，做風搓發大水災，便橋會分水打忒，大人乜毋敢過水，佢兜就愛彎到當遠个大橋項過。

想著頭擺讀書个情景，兩儕將就坐在路脣打嘴鼓。看著路兩片个禾頭田，開路開忒一大片。弘彰仔講佢盡記得，國校三年生該下，學校安排課表，間禮拜愛在下晝頭上課，朝晨頭就在屋下寮；兩儕就講同在半朝晨仔就背等書包仔去學校，旦勢係一路行一路搞，搞到時間差毋多也，正入教室。有一擺停在河壩沙埔仔項搞沙仔，挖著頭擺米國兵空襲臺灣留落來个砲彈析，做得拿去賣壞銅壞鐵，該下晝就有枝仔冰好食。

兩儕再過騎，騎到橋該片頭，看著一條兩線道个大路，佢同佢紹介，這條正開無盡久个外環道，做得舒解市區个塞車情況。弘彰仔緊看大路脣，想想啊講，這開路開忒个這堵田，田肚會種芥菜過點蘿蔔仔，菜廂面項會攤一層禾稈，堵著當寒个天時，頭暗晡落霜，第二朝晨，佢兜去學校讀書个時，行到這，菜廂頂禾稈項就看得著一層白霜，一大陣細姪仔赤腳馬踏，全部走去跔禾稈面項个霜，緊蹕緊笑，十隻腳趾凍到紅紅腫腫，細姪仔个心肚淨知有好搞，哪會感想著該種無鞋好著个心酸歲月。

作者：龔萬灶

☆詞彙學習☆

【搞伴仔】gau` pan` e`：玩伴。

【煞煞】sad` sad`：急忙。

【禾埕】vo` tang`：曬穀場。

【田畝】tien` don`：一坎一坎的田。

【摸螺挖蟹】mia` lo` ied` hai`：撈田螺、抓螃蟹等無關生計之事。

【亮亮】lang lang：很平坦光滑。

【赤腳嫻踏】cag` giog` ma` dab：打赤腳。

【田塍】tien` sun`：田埂小徑。

【發大水】bod` tai sui`：洪水氾濫。

【分水打忒】bun` sui` da` ted`：被洪水冲掉。

【講同】gong` tung`：約定、約好。

【旦勢】dan` sii`：幾乎是。

【枝仔冰】gi` e` ben`：冰棒。

【禾稈】vo` gon`：稻草。

【細姪仔】se o` e`：小孩子。